

Վերլուծություն

Եկամտային հարկի տարեկան հայտարարագիր ներկայացնելու կարգի վերաբերյալ

Եկամտային հարկի տարեկան հայտարարագիր պետք է ներկայացնել self-portal.taxservice.am կայքի «Ֆիզիկական անձանց էլեկտրոնային հաշվետվությունների ներկայացման համակարգ»-ի հայտարարագրման բաժնից: ՀՀ հարկային օրենսգրքի 53-րդ հոդվածի 5-րդ մասով սահմանված է, որ հարկային հաշվարկները հարկային մարմին են ներկայացվում էլեկտրոնային եղանակով:

ՀՀ հարկային օրենսգրքի 310-րդ հոդվածի 1-ին մասով սահմանված է, որ հարկ վճարողի կամ հարկային գործակալի կողմից Օրենսգրքով սահմանված հարկային հաշվարկների՝ էլեկտրոնային եղանակով ներկայացումն իրականացվում է հարկային մարմնի հետ կնքված՝ էլեկտրոնային եղանակով հարկային հաշվարկների ներկայացման մասին պայմանագրի (այսուհետ՝ ԷՆՊ) հիման վրա և էլեկտրոնային թվային ստորագրության, էլեկտրոնային ծածկագրի ու գաղտնաբառի կիրառության միջոցով: Նույն հոդվածի 2-րդ մասով սահմանված է, որ պայմանագրում նշվում են պայմանագրի առարկան և ծառայությունների մատուցման պայմանները, հարկ վճարողի կամ հարկային գործակալի կողմից էլեկտրոնային եղանակով հարկային հաշվարկներ ներկայացնող լիազորված անձի անձնագրի կամ նույնականացման քարտի տվյալները:

Այստեղից հետևում է, որ 2024 թվականի համար ներկայացման ենթակա եկամտային հարկի հայտարարագիրը ներկայացվում է միայն էլեկտրոնային եղանակով՝ հայտարարատու ֆիզիկական անձի կամ էլեկտրոնային եղանակով հարկային հաշվարկներ ներկայացնող լիազորված անձի կողմից: Այսինքն, Օրենսդիրը նախատեսել է լիազորված անձի կողմից հարկային հաշվարկներ ներկայացնելու հնարավորություն:

ՀՀ Սահմանադրության 6-րդ հոդվածի համաձայն պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով:

Մինչդեռ, ՀՀ պետական եկամուտների կոմիտեի պաշտոնական կայքում եկամտային հարկի հայտարարագրի ներկայացման էլեկտրոնային համակարգում լիազորված անձի կողմից համակարգ մուտք գործելու, ստորագրելու և հանձնելու հնարավորությունը սահմանափակված է:

Հետևաբար, ստացվում է, որ ՀՀ պետական եկամուտների կոմիտեն խախտել է ՀՀ հարկային օրենսգրքի պահանջները, իրեն վերապահել է լիազորություններ, սահմանափակել է անձանց իրավունքները, Սահմանադրությամբ կամ օրենքներով դրանց սահմանման (հաստատման) լիազորությունը չունենալով:

Հաշվի առնելով վերը նշված խնդիրը, առաջարկում ենք՝ նախատեսել լիազորված անձի կողմից համակարգ մուտք գործելու, ստորագրելու և հանձնելու հնարավորություն կամ, հնարավորություն ընձեռնել եկամտային հարկի հայտարարագիրը ներկայացնել առանց էլեկտրոնային ստորագրության (հարկային մարմնի կողմից տրված գաղտնաբառով մուտք գործելու հնարավորությամբ):

Կատարող՝

Վ.Եղոյան

«Ա.Գ. Սախարովի անվ. մարդու իրավունքների պաշտպանության հայկական կենտրոն» ՀԿ

Շիրակի տարածաշրջանային մասնաճյուղի իրավաբան

26.02.2025թ.